

四庫全書

集部

欽定四庫全書

集部

不繫舟漁集卷一至三

詳校官編修臣范來宗

中書臣劉源溥覆勘

覆校官中書臣朱鈐

校對官助教臣胡予襄

謄錄貢生臣孔繼峯

欽定四庫全書

集部五

不繫舟漁集

別集類四元

提要

臣等謹案不繫舟漁集十六卷元陳高撰高

字子上溫州平陽人至正十四年進士授慶

元路錄事未三年輒自免去平陽陷棄妻子

往來閩浙間自號不繫舟漁者至正十六年

浮海過山東謁河南王庫庫特穆爾

原作擴  
廉鐵木

克今改正於懷慶密論江南虛實庫庫特穆爾欲

官之會疾作卒蓋當國祚阡危猶力謀匡復

明太祖稱王保保真男子

即庫庫特穆爾

如高者事

雖不就其志亦不愧王保保矣不但詩之足

傳也明洪武初蘓伯衡訪其遺集釐定成編

題曰子上存稿此本題不繫舟漁集不知何

人所改文格頗雅潔詩惟七言古體不擅場

絕句亦不甚經意其五言古體源出陶潛近

體律詩格從杜甫面目稍別而神思不遠亦  
元季之錚錚者矣元又有嘉定僧祖柏其詩  
亦名不繫舟集見顧嗣立元詩選集中有題  
倪瓚芝秀圖詩蓋與高同時然其詩不及高  
遠甚今未見其本以集名相亂附著其異於  
此庶來者無疑焉乾隆四十一年六月恭校  
上

總纂官臣紀昀臣陸錫熊臣孫士毅

總校官 臣 陸 費 墀

不繫舟漁集原序

子上陳君既歿之十有八年余過其里從其子訪其遺  
稿得詩文總若干首詩為四言為五言為七言為古為  
樂府為律為絕凡若干卷文為記為叙為銘為贊為箴  
為跋凡若干首加詮次焉釐為若干卷題曰陳子上存  
稿俾藏于家叙曰夫所貴乎文辭者非以言之工而貴  
之也當理之言斯貴矣其言當理雖其人無足取君子  
猶不以人廢言而使之泯沒也況其人若子上者抗特

操於亂世臨患難死生禍福而不易其志不污其身可謂賢矣而其言也揆諸往哲而有合傳之來世而無愧可使泯沒而無聞乎此予于其遺稿所以不能已其情也六藝百氏之言子上無不學而以求道為急凡詩文未嘗苟作要其歸不當于理者蓋鮮矣自為舉子時其所作已為流輩推重金華胡仲申先生以古學名嘗傲視一世人于文章靳許可獨敬愛子上而稱之曰能其擢進士也朝之名公鉅卿若翰林歐公太常張公禮部

貢公御史吳公助教程公僉謂子上之文宜用之朝廷  
施諸典冊相與論薦之而子上以親老顧取慶元路錄  
事南還赴任未二年度時不可為輒自免去擅兵柄而  
倔強州郡間者爭欲子上用之而子上終不為其用周  
流東西常使人不知所至未嘗終月淹也最後總戎其  
州者必欲脇致之子上遂棄妻子南至于閩又北至于  
懷慶尋以疾卒既卒而其文亦無能為收拾者以故平  
生所作存者止此云嗚呼得其材于天成其學于己不

獲措諸事業而徒托之述作君子之不幸也至于述作  
又多放失不幸抑何甚耶藉非子上所搽自足以暴于  
世則天下之于子上何從而知之何從而信之此予之  
所以重有慨也其友謝復元氏欲率同志鏤版以永其  
傳力雖不逮而未嘗忘也豈不猶予之情歟豫章揭先  
生伯防稱子上之文上本遷固下獵諸子詩上溯漢魏  
而齊梁以下弗論可謂知言矣復何所庸吾喙哉前翰  
林編修眉山蘇伯衡序

欽定四庫全書

不繫舟漁集卷一目錄

四言古詩

采蘭

漢水贈別也

樹風堂

送徐勉之為慈湖書院山長

息菴為孔魯茂先生賦

欽定四庫全書



卷一目錄

欽定四庫全書

不繫舟漁集卷一

元 陳高 撰

四言古詩

采蘭

采蘭采蘭于彼江渚悠悠我思在彼山下采蘭采蘭爰  
采其杞我之所思可與晤語采蘭采蘭以葉以藥以葉  
以藥以贈君子

漢水贈別也

瞻彼漢水其流潺湲之子于邁言采其蘭嚶嚶好鳥集  
于林間娟娟美人可以晤言我思美人在漢之水秉心  
久臧威儀楚楚聿求厥德將子是與慎爾優游成爾譽  
處南山有玉琢以為琚北山有梓規以為輿君子好修  
始終弗渝

樹風堂

肖貌兩間具人之形父母遺體實全其生鞠育拊復思  
莫與京乾覆坤載不可以名相彼鳥矣反哺飛鳴夫何

人斯而敢忘情竭力報德惴惴弗勝或徯萬鍾願彼餘  
齡年歲弗與日邁月征辟樹欲靜風乃不停人子之心  
曷其自寧美哉沈君獨懷惕兢曰予祿仕將以親榮親  
以日耄我志靡成歸築我室耕我邱塍菽水朝夕其樂  
則羸嗚呼沈君古人是徵養志為大奚庸三牲願我當  
世率由以行

送徐勉之為慈湖書院山長

北風蕭蕭冬日荒荒之子振轡歲暮有行子行何之于

甬東鄉維甬東鄉慈湖湯湯有嚴先哲厥廟煌煌往主  
其祠文教以昌懿被先哲其道允臧如星如漢耿耿其  
明尸而祝之千載有光伊世之昧如瞽偃偃乃多其岐  
而亡其羊孰法孰師以祛其盲嗟嗟遺文湮鬱弗揚之  
子之往春秋薦饗翩翩珞來遊來翔之子之往淑其  
俊良蔚彼鳴鳳宜集高岡胡戢其羽而下于傷維屈乃  
伸有弛必張善爾令聞終履康莊高也作詩其言匪狂  
式慰子懷于以送將

息菴為孔魯茂先生賦

維山之阿幽幽其室有美君子爰息而逸其息伊何為  
美實多以寢以興以居靡他翛然忘世匪遯而逝時止  
則止聊以舒憩者遊而驅今息我車者仕而趨今息我  
軀我息我交我友日遠我息我心我慮斯遣庸庶勞生  
我息無營羣愚逐逐我息迺寧澗有鳴泉欄有啼鳥我  
息而聽達彼膠擾庭有嘉樹巖有停雲我息而觀謝彼  
紛紜坐則怡怡臥則熙熙如丸在區如水不波息而勿

息中為物役息焉而息息乃真得人耄勿息我息是耄  
在古賢達或與同好行者止蔭倦翼知還於茲息焉永  
矢勿諉

不繫舟漁集卷一

欽定四庫全書

不繫舟漁集卷二目錄

騷體詩

南山有思友生也

題蘭竹

思遠寄諸友生三首

菊頌為易尚賢賦

題道原所作墨蘭蕙四首

欽定四庫全書



卷二目錄

欽定四庫全書

不繫舟漁集卷二

元 陳高 撰

騷體詩

南有山思友生也

南有山高維虛矣其上伊石不可以輿兮念子之遠莫  
我愉兮南有水清維流矣其泮伊陸不可以舟兮念子  
之遠莫我儔兮盲風淒淒卉木病瘁我行吳會曷其底  
居二三君子眷我寡類勉進厥修始終令譽

題蘭竹

懷美人兮南浦倚疎篔簹兮愁予佩嘉言兮同心期歲寒兮容與

思遠寄諸友生三首

水之廣兮不可以涉舟則可航兮我舟無楫伐木為楫兮孰與捺我思我友兮心為忉忉

路之修兮不可以徒車則可載兮我車無輿伐木為輿兮孰與駕我思我友兮不忘晨夜

翼于風兮害從以飛鱗于湍兮害羣以隨我遠我友兮  
我友我思我思我友兮我友不知

菊頌為易尚賢賦

爰有嘉卉所性貞兮乾剛坤柔中稟精兮綠葉蓊蓊叢  
而不蔓兮厥花伊何金英粲兮煜其婉婉懷正色兮幽  
淡清絕香可服兮媚于晚節守志俟命兮蹇茲孤高不  
可連搖兮吁嗟今人莫爾知兮說媚棄正夫何疑兮邈  
世無悶聖所躡兮彼美君子其德可與比兮

題道原所作墨蘭蕙四首

有草維蘭兮在彼中阿上陰幽篁兮白石峩峩雪霰交  
零兮歲冉冉其幾何百卉憔悴兮為憂孔多嗚呼保此  
貞節兮其心靡他

蘭之花兮有苾其馨蘭之葉兮其色青青嗟蘭之生兮  
獨耿介而幽貞我思古人兮言掇其英

有草維蕙兮生於林坳與荃為類兮與蘭為曹蕭艾離  
羣兮不復混淆其敢自棄兮化而為茅

蕙之花兮叢生而馥蕙之葉兮可紉以佩擘芳菲兮勿  
使蕪穢鴟鳩兮不瑕有害我思靈修兮歲月其邁

不繫舟漁集卷二

欽定四庫全書

不繫舟漁集卷三目錄

五言古詩

寓興二首

閒居四首

出門

掃室

送竺上人歸狼山

戊戌新歲感懷二首

晚歸

雨中有懷季申伯楊彥祥二文友

客吳中詠懷三首

山居

遷居

過俞嶺

泊館頭步

夜泊臨平山下有懷行道原上人

歲首自廣陵入高郵舟中作

己丑歲元正二日發高郵

晚步

近山軒燕集

青楓嶺王貞婦祠

途中遇雨

感遇二首

過馮公嶺

感興二十五首

喜聞友人來訪

送錢思復二首

送陸有章分題得巽山

汪節婦詩三首

寒江分韻

觀稼

瓜園

送朱維敬奉使還京十首

留別諸友分韻得日字

因彭仲愈歸江東寄屠彥德得東字

題畫

送董重仁

村居

送吳有齊提舉台州醫局

寓真華玄館

渡沂

遊白雲山

怡雲軒為茂上人賦

贈醫者俞明遠

青田山房為劉養愚賦

茶蘼花下宴集時以古人詩莫道春歸有遺恨

典刑猶在此杯中為韻分得典字

遊鳴山寺

登蒼峴嶺

送彭仲愈歸江東

庚子八月遊荃湖登東阜觀新龍湫時同遊子

白修撰一初上人

次日同諸公遊西瀨舊龍湫

為章以元題扇

濯翠亭為閑屋上人賦

葡萄泉

寫興

征婦怨

落梅曲

商婦吟

白紵詞

野菊花

題臨清亭

題滕王閣圖

岳陽樓圖

行路嘆

種藥軒為孫仲誨賦

送孔州判得代歸鄉

懲愆

達觀

題陶淵明歸去來圖

戊戌旦日方謝事閒居

西旅藝圖

會徐元彬家食櫻桃

讀徐君雲松小稿二首

長行歌

戊戌歲端午寓居慈溪有感

發嵯縣

整書冊

秋成大水傷稼憫農有作

過廣福寺石屏山房懷曾子白修撰陳伯清侍

講

郊行

入郭

題高士煮茶圖

為農

擇穀種

白露

治圃有感

同蔣伯威朱德常遊育王山

寄張籌

觀湖

蔣狀元墓

古意

題山居圖

喜雨贈林子卿陳正夫

蘭蕙同芳圖

己亥六月五日趙彥名鄭玄成過寓所飲酒

雜詩十首

懷交川諸友

題張子房歸隱圖

石菖蒲

悼慈童

種橿花

漁溪隱居為俞希聲作

贈薛相士

花圖

容春軒

對菊

題蘭

陸景周東園隱居

送章鍊師

惜別

大水懷何汝樵

松泉舊隱

畫鷹

送商時雨

出吳門有懷聲公

山陽訪懷三首

欽定四庫全書



卷三目錄

欽定四庫全書

不繫舟漁集卷三

元 陳高 撰

五言古詩

寓興二首

入山采瓊瑤雲深白石堅瓊瑤不可采中心抱悵悵悵  
悵思美人青青見芳草芳草在空山美人隔長道  
種花種蘭蕙取士取君子蕭艾不馨香小人混臧否如  
何此芳草零落在山林古人不可見悠悠傷我心

閒居四首

今歲厭羈旅歸來田里間  
棲遲涉春夏居幽心自閒  
遠市絕喧啾閉門謝衣冠  
無營免慮外守拙非懷安  
晨興微雨霽課僕往西園  
嘉蔬摘翠葉時果收朱丸  
何能謀生理聊用致盤餐

近舍數畝田深耕藝黍稷  
黍稷日以茂青青滿阡陌  
鋤耘去稂莠經營待秋穡  
農事果艱辛勞生念衣食  
雖有服力勤庶免飢寒  
迫豐歲或可期優游度朝夕

暇日過南鄰田父喜余至為余具酒漿坐間雜老稚苦  
言無穀饑但有園蔬味草率見真情酬酢感深意白日  
忽已暮頽然竟成醉所遇聊足懽何用計餘事

陶潛冲曠士棄官樂田園于世百無營唯愛濁酒樽乘  
化知委運賦詩多達言我今解簪紱歸來分所安荷鋤  
開荒徑種菊葉已繁佳辰步幽隴永日憩衡門前修詎  
敢企庶以避時喧

出門

出門尋微徑獨行  
遶荒村荒村居人少  
草屋畎畝間雞犬  
隱深竹桑麻被長  
園方春農事興耕  
者日已繁鋤耘愧  
力弱詎知衣食原  
入山虎狼怒涉海  
波濤翻徘徊奚所  
適顧瞻生永歎抱  
拙守閭里白日如  
流九念昔賢與哲  
棲棲不遑安懷居  
豈余心時乎復何  
言

掃室

日日掃居室既掃  
塵復生性癖頗愛  
淨去塵心乃清居  
間雖少事處世豈  
無營弱子在襁褓  
幾時堪使令蹉跎

嘆光景困守限戶庭非無四方志邊隅未休兵遙聞官  
車出盡毀徐州城朱門與碧牖回首成榛荆江淮及閩  
越寇盜之所經人民苟全活奔走不得寧睠茲蓬廬下  
棲遲聊慰情但當勤洒掃讀書飽藜藿萬事委天命何  
必求榮名

送竺上人歸狼山

飛雲無定跡有時亦還山飄飄方外侶倦遊終念安晨  
興振衣袂登舟沂江湍適意且歸休及此歲未闌狼山

近淮楚中有屋數間燕坐古樹陰濯足滄波寒時招白  
鷗鳥永日共幽閒

戊戌新歲感懷二首

青青庭前栢晴日照顏色枝間巢衆禽朝去暮來息中  
有烏尾烏能生反哺雛新歲憶慈母獨立意躊躇

北風吹江樹冉冉江雲度隔江山嶺高雲行過山去野  
鳥逐雲飛力盡不能隨新年憶親友極目望天涯

晚歸

西崦日初沒，遠樹生夕陰。  
晚步草露濕，獨歸松徑深。  
入室載笑言，稚子牽衣襟。  
尊中有濁醪，可以酌復斟。  
坐來窓牖白，佳月出東林。  
幽情寄觴詠，適意忘華簪。  
自得閒居理，寧憂外患侵。

雨中有懷李申伯楊彥祥二文友

幽室隱几臥，覺來聞雨聲。  
開窓土痕濕，井邊春草生。  
旅寓惜芳草，閑居抱幽情。  
美人期不至，誰與共持觥。  
相思巷南北，如隔萬里城。

客吳中詠懷三首

歲暮旅懷深憂思怨宵永謀生計何拙悠悠去鄉井百  
為無一成壯志欲灰冷寄形天地間再再度光景青年  
詎長留綠髮變俄頃感嘆起中夜危坐心耿耿幽窻寂  
無聲明月照孤影

慈竹冬生筍內茁知其因而我為人子乃獨遠其親  
年迫衰暮問安垂晨昏當門惟弱子耕稼服力勤瘠土  
所入薄何以奉甘珍負米愧前哲漂梗慚一身憂心奚

所托仰視南飛雲

弱質難任重晚學終寡得努力希前修駑馬追驥迹羈  
旅既荒蕪衰老况侵迫為人生世間所貴能有植條焉  
同物腐豈不深可惕刮摩賴友生庶幾成令德羣居以  
遊談於我竟何益矢心苦同志願言慰昕夕

山居

避喧林下居抱病山中臥家貧酒屢空性懶詩慵課禽  
聲隔樹啼雲影當窻過獨有采樵人時來慰衰惰

遷居

遷居城南村幽情意所適室廬頗虛敞結構自疇昔側  
檜護周垣修竹蔭竒石涓涓井泉清靄靄蒼雲白去郭  
二三里迥與囂塵隔於茲載寢興朝暮靡所迫讀書南  
窓下奉食老親側褰裾戲童穉煮茗待賓客身閑貧亦  
佳機忘心已寂旋種園中蔬春葉庶堪摘時危幸安處  
生理寧復識雖非曠達夫翫世聊自得

過俞嶺

劉山已行過俞嶺仍嶮巖木橋度水滑石徑臨澗危舉  
目惟層峯俯首不敢窺道逢荷擔者相問各言疲嗟予  
亦何事跋涉無已時去年此登涉今日復來茲行役豈  
吾願倚門無乃思人生宇宙中勞逸誰所為既云有形  
累焉能息驅馳

泊館頭步

朝發芳林嶺夜依館頭泊厭茲跋涉勞懷哉田園樂生  
理苦艱難歸耕難悠邈貧窶何足憂甘旨焉所托棲棲

道路中素心負邱壑行年三十餘齒牙半搖落良由筋骨疲豈但質衰弱憂思耿不寐起觀衆星白羣雞鳴江臯已復戒行客

夜泊臨平山下有懷行道原上人

泊舟臨平下月出湖水白村墟警羣吠風林振伏翼遊子多愁思僕夫倦行役開尊欲自醉對酒不能食緬懷吳中遊詎念飄梗迹衍公與吾諧交誼比金石別來遙相望何以慰岑寂暫營東去棹即理西征屐

歲首自廣陵入高郵舟中作

北風吹湖水遠行當歲徂孤舟無同人相依唯僕夫遙  
睇高郵城彷彿十里餘落日去地遠飛雁與雲俱悠悠  
思故鄉邈在天南隅慈親倚門望我身猶道途羈旅豈  
足恤但念骨肉疎何當脫行路歸臥山中廬

己丑歲元正二日發高郵

昨日初獻歲今晨發高郵飄蓬無節序此身真若浮晴  
日照野水好風順行舟舟人為予祝新年無百憂自笑

道路中奔走向何時休朝為吳鄉客暮向淮楚遊安居豈  
不願况乃非人謀乾坤無終極江海成淹留俯仰視黃  
鵠奮翅何悠悠

晚步

雨霽野色淨杖策步殘陽度橋尋幽徑沿溪遠西莊隴  
麥生微秀籬菊散清香行吟來復往零落忽沾裳

近山軒燕集

至正十二年夏四月八日會于張思誠之近山軒時

孔君正夫方自吳回曾伯大陳德華徐德顯金士名  
呂敬中盧文威鄭子敬咸在而高亦與焉皆能文之  
士酒酣正夫言曰茲集也不可以無記乃命賦詩分  
韻取陶淵明孟夏草木長繞屋樹扶疎之句凡為詩  
十首嗚呼朋友會合而歡晏詠歌亦古人所重也然  
平居無事時而接杯觴弄筆墨此特文人才士之常  
耳當茲海內用武之日而吾與諸君居左邑下州得  
以恬然安處相與飲酒賦詩為樂豈非幸歟夫樂而

不知其樂者衆人之情也樂焉而不以文者荒于樂者也今也樂其樂而必以文亦可謂不失其正矣叙而錄之所以不忘也

幽軒近青山層簷蔭高木茲晨天氣佳涼雨破裊燠鳴蟬度新聲叢蕙散餘馥几席具陳列籩豆進穀菽故人吳中歸舉酒喜相屬微酣各忘形起坐命棋局好樂初匪荒咲語勝絲竹人生百年內光景猶轉轂况當艱虞際歡會情愈篤酒闌復何言長歌紫芝曲

青楓嶺王貞婦祠

峩峩青楓嶺其下溪流駛昔年王貞婦抱節向茲委婦  
本家赤城從夫誓終始國破懼百憂囚奴隸戎士何哉  
千夫將悅色思配已良人被殺戮禍延舅姑氏殘生雖  
無依大義安敢毀一死誠不難執縛未有以詭詞告將  
軍妾豈負君子苟妾能事夫事君亦如此聽妾衰經除  
終當侍牀第軍將聞茲言防虞稍為弛行行至斯地四  
顧行且止悲風滿秋山落日啼青兕矢詩寫我心書石

鬻我指精神動靈祇血染石為紫躍入千仞淵魂飛魄  
沉水至今立祠廟鐫珉著哀誅生懷貞淑姿死為節義  
鬼我來撫遺跡泪下不能已因悲丈夫子食祿昧廉恥  
堂堂襄淮帥授城猶棄屣視此寧不愧生存孰如死嗚  
呼千載下風化賴綱紀

途中遇雨

出郭天始晴入郊雨仍灑農夫且怨咨况吾行道者前  
途上修嶺四顧迷廣堦登涉極煩倦幽思何能寫軀體

父母遺非敢並牛馬立身若未遂勞形亦天假豈無舊  
田廬隱居事耕稼垂釣清水濱讀書茂林下歲晚成斯  
願今茲未遑暇

感遇二首

慈烏在巢時相依母與子因風出巢去顧影獨千里千  
里何悠悠天高露如水烏飛還故枝遊子悲別離

中原有高山檻泉出其隅涓涓入溪澗所性良已殊奔  
流無日夜東去趨尾閭逝水無回波少壯能幾時

過馮公嶺

絕壁倚霄漢，千峯勢如馳。何年五丁士，鑿石連天梯。縈  
紆不可上，髣髴登我眉。白石齧我足，霜風吹我衣。前途  
政迢遞，我已筋力疲。寒花道傍開，幽鳥林間啼。彷徨俯  
自慰，少憩日已西。浮生浪奔走，困踣胡爾為。他年履坦  
道，慎勿忘嶮巖。

感興

自漢以來五言之作多矣，其善者大抵皆直致無華。

飾之辭簡淡而意味深遠下是則雕鏤綺靡不出乎  
風雲月露花卉禽魚之間而理趣蔑如也昔唐陳拾  
遺嘗作感遇詩詞格高古而新安朱子則病其淫于  
仙佛怪妄之說故朱子齋居感興之作乃一寓于理  
扶樹道教而辭之要妙特其餘耳殆未易于古今詩  
人律之也予客居無事讀書餘暇搯觚染翰適意于  
詩得二十五首亦命之曰感興率皆托興成章鄙俚  
無文固不敢窺作者之藩籬而視朱夫子之扶樹道

教者夫何敢望獨于陳古道今引物比類意在懲勸  
不習于雕鏤而不淪于怪妄則庶乎其萬一焉或可  
以俟觀民風者之采擇云爾

混沌既分裂乾坤遂開陳九重不可測八紘渺無垠遙  
思天地先一氣應絪縕自從開闢來不知幾千春太樸  
一以散智巧方紛紜至化日銷蕩誰能反其淳吾將遺  
斯世泰初與為鄰

兩儀辨清濁萬物紛迴互幹旋造化機豈不以理故無

形馬有象彷彿隨所寓太極祇強名駕說無乃固誰能  
窮其原逝與遊玄圃

茫茫上古初斯人若麋鹿野處食猩猩虎狼共馳逐皇  
天降神聖為氓去荼毒羲農與軒轅奮起相接足乘馬  
穿奔牛採耒種嘉穀皮毛作衣裳巢穴變廬屋元功被  
萬世蚩蚩遂生育古來無聖人吾其久魚肉

唐虞邈以遠禹湯亦悠悠周轍一東狩王綱遂漂流春  
秋更五霸日月尋戈矛陵夷逮七國斯民益無聊戰血

滿溝斬殺呈入雲霄高君佐嬴秦變法開田疇積強至  
六世虎噬吞諸侯宰割天下地郡縣羅九州焚書任法  
律儒士咸虔劉漢皇起豐沛三尺誅民讐開基四百年  
烈烈壯鴻猷惜哉英明主不學道遠謀一時繪狗徒贊  
業非伊周遂使皇王政廢墮不復修此機一以失餘恨  
空千秋

孔孟起衰世棲遲走諸國一身葬邱墟斯文寄方冊淵  
然洙泗流浩若江海澤伊人一以遠異端日滋息誘民

猶墮麤竒言勝楊墨亡羊多歧徑周道長荆棘舉世醒  
既深何以挽沉溺上帝司民政而乃相淫慝天意尚如  
茲滔滔誰與易

崑崙幾千仞王母當中居縹緲三神山盡宿飛仙徒粲  
瓊以為糧鞭虬以為輿壽命等天地出入乘空虛此事  
古相傳不知真有無但傷世迫阨百歲猶須臾之人果  
可見吾欲膏吾車

有生必有死芸芸歸其根靈魄既入土何所藏吾魂世

愚不曉事妄說相循環人物互變幻形散神獨存死生  
信如此有身乃夤緣不用男女構軀體應自完茲理至  
昭晰可與智者論

羲和鞭靈車去去一何速乍見升扶桑俄然次蒙谷光  
陰既如許人世誠局促胡為有限身乃遂無涯欲夸父  
矜其能走遠不知復至今西海上青青鄧林木

策馬吳城西攬轡姑蘇臺寒林噪烏雀故址叢蒿萊登  
高忍悽愴懷古思悠哉夫差藉世烈起土殫民財曲木

構華館離宮蔽層厓  
嬌嬈醉越女歌舞環  
吳娃觀樂方未畢  
爭霸心已灰不須百  
歲後已見麋鹿來興  
亡雖古有窮欲乃先  
摧覆車不自戒長使  
後人哀

青山或可移白石尚  
可轉志士懷苦心九  
死不願返首陽餓  
仁賢至今激貪悞汨  
羅沉楚累千載悲忠  
蹇人生誰不死身沒  
名貴顯胡為草玄人  
美新思苟免

楚人廢醴酒穆生不  
復留申公眷恩德終  
為楚市囚保身貴  
明哲知幾諒寡尤後  
來賢達士誰能繼前  
修

豪家列華第披金飯珠玉茅屋耕田夫衣食常不足均  
為羲皇民胡焉異榮辱遠懷雍熙世寧復有茲俗誰與  
開井田吾思食其肉

乾坤奠高卑設位終不易聖人定民志貴賤有常式云  
何世道衰習俗長奸慝輿臺百金裘氓賈八珍食賈生  
久不作誰為長太息

縹緲浮圖宮儼若王者居列徒二三千僮僕數百餘飽  
食被紈素安坐談空虛秋來入租稅鞭撲耕田夫不惜

終歲苦徵求盡錙銖野人不敢怒泣涕長歎歎

五侯佳子弟弱冠乃高舉承籍閱閱功官爵紆青組五  
馬躍春華一麾守王土誅求肆狼貪立威嚴箠楚斯民  
天所眷視之如草屨置官擇賢才茲事由來古君看龔  
與黃何嘗有門戶

邊城將家子十歲承華胄腰懸金虎符萬夫擁前後上  
馬未勝甲引轡猶脫肘日日驅官軍指麾縱鷹狗生當  
太平世無復事爭鬪天家賜高爵膂力吾何有但問祖

父資莫問能事否

客從北方來少年美容顏繡衣白玉帶駿馬黃金鞍捧  
鞭揖豪右意氣輕邱山自云金張胄祖父皆朱璠不用  
識文字二十為高官市人共咨嗟夾道紛駢觀如何窮  
巷士埋首書卷間年年去射策臨老猶儒冠

步出城門道忽見羣車馳車中何所有文具光陸離美  
娃載後乘銷金燦裳衣問之何如人云是官滿歸聞者  
交嘆息清名復奚為

水生隋侯珠山出和氏璧  
隋珠光照乘和璧白盈尺  
舉世以為寶連城售其直  
寒者不可衣飢者不可食  
珠璧之所存莫夜尋戈戟  
所以君子人其實在乎德

淳風變澆漓薄俗廢直道  
吳女市新妝入宮擅華姣  
中心苟不美顏色有何好  
朝來枝上花日暮萎芳草  
懷哉空谷人貞潔以終老

大江日以東曜靈日以西  
在世閱光景倏忽流駒馳  
繁華向春開落葉迎秋飛  
榮枯有常理人生猶若茲  
愚夫

昧遠識荒淫速其疲誕者斬神仙不死今有誰何如安  
吾分委順以從時

丈夫重意氣不為兒女悲得喪如浮雲戚戚竟何為君  
看松與栢歲寒青不移槐柳遇霜露憔悴無光輝懷哉  
古之人永與今世違

東風二三月桃李滿名園乘時得其所獨愛陽和恩英  
英籬間菊開花當歲寒已無雨露滋兼有風霜患君子  
力為善窮達寧復論紛紛競炎熱得意何足言

明明空中月浮雲能蔽之我心忽不樂清夜有所思古  
人既云遠古道日以非後生采春華舉世吾誰歸飄風  
颯然至吹吾裳與衣恨無雙飛翼遠逝凌風飛感傷復  
奮激沉吟以徘徊

悲風西北來樹木聲蕭蕭蟋蟀鳴四壁鴻鴈飛層霄時  
光忽已異四序如更徭人生無百年轉矚朱顏凋胡不  
崇明德早使勛業昭空悲千載下身死名寂寥

喜聞友人來訪

遯跡向荒郊客身如縶維良朋不我顧出門何所之故人漢水上悠悠每懷思惠來忽有約風雨無愆期終夜喜不寐天明起披衣命僕掃齋室拂拭牀與帷臨河望舟楫行道想逶迤我有一樽酒酒味甘如飴久藏待君至盥爵共君醜飲酒豈足貴真情良在茲

送錢思復二首

雨晴春正佳潮生日初上出郭送歸人江臯繫蘭槳之子文章彥儒職困羈鞅三年留海邦聲名動官長故鄉

忽在念東書遂長往上官再三留終焉不可強白雲繞  
孤嶼晴煙連雁蕩東風花滿城好鳥鳴三兩子去吾獨  
居幽景負心賞

見面方喜熟離別苦多情人生倏聚散猶如無根萍我  
從湖海歸眷眷求友生子昔尚淹留今朝舍我行白駒  
不可繫何以能合并春江波濯濯猗蘭葉青青采蘭江  
之澣與子結同盟豈無桃李花所貴在芳馨願子勿捐  
棄歲晏保幽貞

送陸有章分題得巽山

巽山如層臺積翠俯城郭古來秀松楸玄鳥隱樓閣雨  
散飛素雲風靜語丹鶴遊人日躋攀杖履相繹絡陸郎  
吳中來雅志好邱壑哦詩松間題攜酒石上酌我性亦  
愛山方期結幽約茲為送子去登涉慄不樂遠別已傷  
懷真境况寥落佇立睇大江孤舟入冥邈

汪節婦詩三首

彼美汪家婦早年喪其夫  
斃斃抱弱女上堂奉舅姑  
舅

姑深見憐問婦意何如凜然秉大義之死矢弗渝託身  
事良人豈為存沒殊寧持如花顏甘隨秋草枯夫婦關  
風化自古有孀居

采杞南山下杞實何離離從夫未有子夫死身曷依旁  
人苦相勸懇懇甘言辭自惟失所天一身將事誰伶仃  
奚足惜但恐節義虧白石尚可轉圭璧有瑕疵此心猶  
松栢歲晏終不移

烈女無異志茲事今罕聞風俗日以降朝寡暮求姻家

寥幽谷中乃有如斯人二十守孤幃白首良苦辛旌表  
未及門敢勞使者勤孀居寧有為風勵豈無因我歌節  
婦詩庶以敦彞倫

寒江分韻

冬雨昨夜霽落日江水寒天影浸澄碧霜風動微瀾飛  
來白鷗淨點點下江干更無垂釣者獨立縱遐觀

觀稼

觀稼往西郊徐步尋畝澮離離實方堅或或葉仍茂翠

浪翻風動綠雲連野靄  
稂莠亦盡除螟蟲幸無害  
功雖人力成根由甘雨大  
豐年在今茲一飽已堪賴

瓜園

園瓜有秋實引蔓亦已長  
蔓長實自大甘美仍內藏  
可以解禱熱入口心清涼  
底言奉玉食未許他人嘗

送朱維敬奉使還京十首

南風吹海水白浪如高山  
張颿引大舸千里瞬息間  
紛紛南來使多從海上還  
早晚至京邑復命趨朝班

桓桓朱將軍丞相所掄擇才過千人俊勇為百夫特徵  
兵來海東泛舟返燕北觀其磊落懷終當獻奇績

重臣居省臺銓衡握清選州郡富官僚將帥豈踈遠君  
胡招不留得非厭軒冕麒麟使可羈夫豈異羊犬

將軍有雙劍吐氣光如虹元是龍所化一雌與一雄指  
揮走妖魅奮擊生秋風何時用神武與國成殊功

盜賊起襄穎延蔓梗江淮征伐六七載道途猶未開孰  
為豪傑士首義羅羣材共成中興業紀功于雲臺

昔在有虞氏修文格三苗孰知荷戈甲敵愾毗清朝行  
師不負糧出沒如風飄寄語山西將功高無自驕

吳郡甲天下城郭何崇崇倉粟數百萬惜哉飽羣虎諸  
將未平賊朝廷已論功將軍有深計何不覓侯封

庸醫疾多死扁鵲廢居閑羣工毀大木巧匠在傍觀追  
奔策鴛蹇擊隼舍鷹鷗嗟哉朱將軍懷才空自憐

新垣欲帝秦魯連思蹈海片言解羣紛高風凜千載自  
古有豪雄而今竟安在君去當努力吾將逐樵采

離別最傷懷况茲風塵際日日送行人為君獨增慨浮  
雲多北飛江流向東逝執手想青天英雄豈終滯

留別諸友分韻得日字

寒色滿大江北風吹落日停舟別諸彥中懷抱湮鬱夤  
緣結金蘭深固比膠漆佳會不可常歲晏改寥慄居者  
成淹留行者念家室分携在俄頃東西永相失俯視流  
波去仰看飛鳥疾人生如浮萍乾坤渺蕭瑟

因彭仲愈歸江東寄屠彥德得東字

歲暮送行舟憂心鬱忡忡因懷平生友寂寥青山中豈  
意松柏姿乃在樗櫟叢經年羈旅別十里夢寐通邊城  
多鼓鼙志士憂世同劇談念終夕道遠無由逢浮雲隨  
風至江水日夜東思君何時來搔首望飛鴻

題畫

天高白露下空山秋寂寥尋真入谷口幽景如見招白  
石可礪齒古木堪懸瓢為愛琅玕淨不知歸路遙

送董仲仁

我歸自京師萬事成懶拙棲遲衡門下不出動經月非  
厭漫浪遊時事與曩別世路多榛棘盜賊殊未滅淮泗  
天漲塵汝穎地流血元戎統貔貅冬夏猶薄伐徵需遍  
郡邑供億到貧乏百物價騰湧貴糶珠璣埒持錢入虛  
市所索每空缺如無三月聚詎免糧糗絕斯時為羈旅  
章甫遶諸越壯哉董氏子出門志軒豁誓覽山水竒徑  
往度西浙嗟我肩暫息羨子興莫遏作詩送遠行極目

江海濶

村居

村居遠城郭來往無雜賓讀書茅屋下無營存道真羹  
藜飯脫粟聊以度昏晨自予入京華歸來屬風塵州里  
經變改親舊多漂淪安全亦以幸荒僻詎敢嗔娟娟東  
園竹冉冉南山雲虛簷噪乾雀方池躍遊鱗閑觀契心  
賞靜處與物親明年繫官守懷此夢應頻

送吳有齋提舉台州醫局

嶄嶄天台山玉立東海湄芝草生其阿碧色甘如飴昔

年劉阮輩采之療長飢邱陵變深谷寧復思來歸神仙  
竟何事絕物祇自怡今君捧檄去遙與猿鶴期優游百  
僚底白日和天倪山中固云樂民瘼當春思

寓真華玄館

本性愛邱壑宦遊違素心所寓得幽勝亦足散衽襟娟  
娟泉石淨幽幽松竹深晴旭破嵐影層雲結崖陰誰信  
居城市有此佳山林虛曠情以適冲寂道所任持觴玩  
嘉卉歌枕聽鳴禽佳時苦無策于世且浮沉

渡沂

昨日發河陽今晨渡沂水驅車遠行邁計程行未已曠  
野人煙稀朔風塵沙起蕭條歲華暮慘淡日色死悠悠  
望京國悵悵念鄉里功名亦何為行役信勞止乃知達  
道人不慕外榮美守真始全天徇物固忘己春風舞雩  
樂懷哉曾氏子

遊白雲山

青山引幽興攜朋來遊歌攀援徑邊樹逶迤上坡陀山

空林無鳥天濶北風多黃菊餘秋英紅葉辭霜柯入深  
得禪宇結構依巖阿幽僧具名饌似喜人相過淹留竟  
日暮談笑仍婆娑人生苦物役適意能幾何乘閑數登  
眺勿用悲蹉跎

怡雲軒為茂上人賦

白雲非可說自遠靜者心上人依雲住過軒松近林雲  
生從何來雲歸無處尋霏霏弄光影靄靄度輕陰含風  
乍承宇散空俄作霖終日覽變態不知飢渴侵至樂得

冥契宴坐豁冲襟干雲豈有意寓物隨所任真趣祇自  
解欲言遂成瘖傍人有問者微笑撫瑤琴

贈醫者俞明遠

俞君昔儒冠讀書四明下簡冊夜鑽窺詞章晝揮洒苦  
厥功效遲迂緩世所捨閉門習方伎探蹟非苟且貫穿  
岐黃篇出入盧扁治業成無全牛開戶應求者投劑始  
下咽愈疾猶解瓦活人術有神利物功豈寡聲名在公  
卿邀請致輿馬養生理自足交遊貴不假移家九龍山

泉石趣仍雅尋山陟嶽岑采朮瞰幽閭予藥或焚券種  
杏當滿莖吾衰苦多病坐久痿及勝肌膚日已枯顏色  
何由楮刀圭倘可分相依作鄰社

青田山房為劉養愚賦

幽幽青田山積翠高千尋大溪經其南白雲在山陰下  
有隱者居卜築邃以深開門面石壁結構依松林牆古  
薜荔長砌閑苔蘚侵簷間戲馴鹿戶外鳴幽禽花卉春  
佳治竹木夏蕭森秋宵月照牖冬晨雪明岑塵坐詎能

到車馬絕過臨其中何所有  
乃有書與琴逍遙足忘世  
俯仰可娛心酒熟聊自醉  
興來詩獨吟永謝城市喧  
何用懷纓簪

茶麤花下宴集時以古人詩莫道春歸有遺恨  
典刑猶在此盃中為韻分得典字

名花開雨中幽姿媚春晚  
紛披被高樹的爍映林苑  
白玉巧雕鏤縞素孰裁剪  
韶華良在茲紅紫况已鮮  
忍看落晴雪清芬委苔蘚  
鄰酒尚可呼春衣詎辭典  
懽然集

佳友坐席傍花展折枝插瓶罐摘蔬泛盃盞娛情詠詩  
章入耳謝筭阮念茲時事艱日聞報兵燹東溟舞蛟鼉  
中州嘯豺犬征伐勞將帥奔走困冠冕吾徒布衣士憂  
患聊喜免且盡花下樂亦足慰屯蹇

遊鳴山寺

久聞鳴山佳近郭青可盼煙霞屢有期杖履未能辦茲  
晨動佳興勇往續前慢同行八九人亦有總角小穿林  
入小蹊越水闕危棧維時冬十月北風歲將晏清芬蘭

菊在秀色松竹間  
楓葉黃欲落  
杞實紅始綻  
石罅鳴寒  
蛩峯頂度  
鳴鴈翫覽亦足欣  
登陟仍喜慣  
巖根古招提  
殿宇瞰溪澗  
粉壁苔蘚蝕  
虛室鼯鼠窟  
因觀真境空  
愈悟浮生幻  
堅固非椿松  
逍遙等鵬鷄  
此身墮塵網  
何日逃世患  
懺悔始自今  
往者不可諫

登蒼峴嶺

平時愛遊覽  
客居苦局促  
閑攜青藜杖  
步繞山之麓  
我蒼峴嶺  
躋攀信吾足  
苔滑石崎嶇  
林深徑紆曲  
勇往

指前岡忍喘出幽谷西日映衰草朔風振枯木玄蟬寂  
無聲飢飈走相逐朱實垂枸杞黃花吐寒菊徙倚憩巖  
端顧招友與僕須臾至絕頂太湖在我目白波何茫茫  
勢與滄海屬北望平楚濶原田布棋局澄江杯杓小句  
容蟻封伏天地信覽廣吾身渺如粟因思去年秋出遊  
壯輿輓志將渡江湖歷覽徧坤軸逶迤陟陽華迤邐登  
涿鹿躡雲上泰岱尋仙入王屋遙觀峩眉雲遂采崑崙  
玉屬茲時險艱風塵滿平陸羣偷起淮潁官軍向曹濮

淹留經春秋未遂償所欲朝廷尚憂虞我何怨拘束回首望南越華蓋倚天綠草堂在其下石田猶可菽悠然動歸興何當跨黃鵠

送彭仲愈歸江東

平生湖海間求友亦云衆知君苦恨晚翩然鳥中鳳論心一語合結交萬金重去年來吳門夜宿幾回共春秋談王霸功烈卑管仲詩章頻倡和出語或嘲哂君才千里驥奔風勒飛鞚手持溪子弩百發靡不中愧我策鴛

駘追逐勞縱送別離每興懷神交屢形夢關山草木落  
雨雪作寒凍還家有程期舟楫清晨連吾亦東南歸歎  
會從此壅豈不念留處時節傾酒甕風塵起淮穎干戈  
滿梁宋蕭條羈旅中日夜成憂恐鄱陽冬魚肥盤殮足  
朝供讀書待時清懷才豈無用深廣須渟瀦菑穫在畝  
種臨分出肺腑肯為兒女哄他時遙見思持此幸吟諷

庚子八月遊荃湖登東阜觀新龍湫時同遊子

白修撰一初上人

適意訪林泉尋幽入山谷綠崖上欽嵌披榛轉屈曲俛  
首神龍居萬丈闕坤軸空虛穴玄竇鏗錚溜寒瀑陰晴  
變須臾靈怪閔幽獨窮源倦躋攀坐憩縱遊目纖纖石  
上荃娟娟澗邊竹飛雲度前岡鳴禽在高木於茲得蕭  
散悠哉遠榮辱任達遺外紛希真企芳躅未遂琴高期  
且從初平牧

次日同諸公遊西瀨舊龍湫

昨日涉東巘今晨窮西瀨徑路稍平夷巖石亦竒怪泉

源從何來飛流宛如帶龍居餘舊跡窟穴分小大遷徙  
自何年詎測神靈會胡為數變化無乃厭污穢至今邇  
吾室足跡未嘗屆清遊因佳朋景物固有待又聞石甕  
潭迥出煙霞外暫歸憩疲倦登覽明當再簪纓久已投  
邱壑素所愛于世復何營逍遙以終歲

為章以元題扇

章生方少年早負英銳氣鳳雛非凡姿驥子有遠志出  
言如抽絲所好在文字訪我容城下頻來見真意我衰

百無能悒悒處城市歸田違本懷褰裳掛塵累時事屬  
多艱交遊嘆疎棄念昔與若翁敦篤金蘭契斯人不可  
見對汝亦頗慰揉木就方圓刮鋸出銛利努力事詩書  
他年看成器

濯翠亭為閑屋上人賦

孤亭依山構松竹環蕭森霏霏洒空翠翳翳生涼陰宴  
坐湛以寂幽棲窈而深高人久忘世于焉冥道心

葡萄泉

薄遊搽草湖載觀葡萄泉中流湧微沫何處通靈源出  
竅蛟珠迸浮波魚目圓髣髴秋架上累累佳實懸象物  
形有類托名美斯傳我欲醞為酒飲之應得仙勿令濯  
塵足污此清且漣

寫興

采葉莫采葛摘花莫摘李葛葉能庇根李花能結子何  
草不生葉何樹不開花從君自採摘不怕損繁華

征婦怨

征夫出門時征婦淚垂垂把酒勸夫飲執手問歸期歸  
期今已過更無消息歸朝朝倚樓望只見鴈南飛

落梅曲

梅花開滿枝無奈曉風吹風吹花落盡爭似未開時花  
開終有落非關晚風惡愁殺愛花人城頭復吹角

商婦吟

嫁夫嫁商賈重利不重恩三年南海去寄信無回言妾  
身為婦人不敢出閨門縫衣待君返請君看泪痕

白紵詞

美人裁白紵裂為上身衣塵垢那能污霜雪映冰肌綺  
羅非不貴隨時變顏色何如白紵衣著破絲猶白

野菊花

野菊生籬下開花亦何遲晨霜白滿野金英粲離離幽  
香空自媚佳色無人知不如桃與李花發正逢時

題臨清亭

幽亭瞰清泚翠巘環嶽岑涵波闌檻淨遶簷花木深遊

魚弄微影好鳥度輕音歡樂酬芳景欣然會賞心

題滕王閣圖

飛閣臨流構華棟憑虛起感慨古今同登眺江山美詞  
翰憶三王笙歌懷帝子寂寞千載餘長天映秋水

岳陽樓圖

巴陵地殊勝洞庭波渺綿層樓碧霄上雕梁綠樹邊想  
像對畫圖遊觀阻風烟何由跨黃鵠憑高望遠天

行路嘆

禽鳥各有巢我行獨無家蔓草野多露渺渺天之涯親  
識不在傍四顧長咨嗟豈無故鄉念兵革政交加豈無  
骨肉情節義乃所嘉白日照青天此身庶無瑕陽林翳  
柔條幽蹊破芳葩方春各自媚爭妍競繁華佇立愈傷  
感憂心復如麻淒淒日將夕迢迢路方賒悲風颯然至  
滿目驚塵沙

種藥軒為孫仲誨賦

層軒構虛敞隱居山谷深繞簷種名藥鋤理力所任枸

杞生夏苗芎藭長春陰綠烟護紫朮翠雨滋玄參幽香  
既可愛靈根亦易尋養性延壽命攻疾驅邪淫活人醫  
國手濟物仁者心佳卉滿園植彼哉奚足欽

送孔州判得代歸鄉

出仕本行志去官豈沽名進退古所重禮讓以為榮孔  
均受代歸挽留車不停白駒何皎皎飛鴻獨冥冥南山  
有叢桂東籬粲黃英念我久辭祿遲子結同盟

懲愆

生晚構屯蹇性真離禍尤祿仕以為養反貽父母憂一  
身被茲累懲愆豈無由末才任冗職奔走內恒羞斯民  
困瘡痍鞭撻忍誅求緩刑志撫字厲節懷清修獨醒衆  
所忌讒構生戈矛曼然空屋中經月成淹留潛棲絕內  
外孤坐自吟謳朝看白日出夜觀明星流西風木葉下  
四壁蛩聲愁感茲時物變蕭條悲素秋念昔賢與哲艱  
危尚拘幽夏臺曾困湯美里乃繫周屈原忠見放楊肸  
賢而囚縲綆苟非罪于人吾何讐知幾昧前訓省躬思

遠猷安得應天運吾道方悠悠

達觀

古今世忽易生死人所同百年駒過隙壽考非椿松胡  
為極心意夸毗爭長雄貴賤竟何為愚哲各有終或云  
樹名譽可以垂無窮詎知身既沒倏忽猶飄風天地會  
有盡人物終漸融堯桀孰是非畢竟成虛空所以達觀  
士乘化遊區中誰知契茲理吾與訪崆峒

題陶淵明歸去來圖

榮名世所逐好爵人易縻孰忘軒冕貴而有田園思陶  
公令彭澤明哲照幾微晉室日陵替周鼎將遷移歸來  
問衡宇幽情託妍辭松菊三徑懷舟車邱壑期冲襟邈  
閑曠遠識超轅義其人既云遠作者今有誰聞風夙所  
慕投紱方自茲覽圖成嘆息永言以為師

戊戌歲旦日方謝事閒居

履端佳節至晴旭散寒威習俗競來往閑居免驅馳感  
茲歲時迈念吾筋力衰求名愧枉已遜世豈遐思詎云

事高尚聊以避艱危  
白梅發新花翠栢長  
舊枝覽物自適意  
傾觴還賦詩俯仰不愧怍  
沉淪寧復辭

西旅焚圖

牧野定周命鎬京開辟雍  
九服成懿德遐陬被皇風  
迨西方國語言重譯通慕義  
不辭遠貢焚隨會同四夷  
既賓服周道信昭融  
聖心豈遂移老臣敢忘忠  
但恐九仞山虧此一簣功  
懇懇訓誥辭燦燦簡冊中  
胡為千載下畫史誇愚蒙  
巧將丹青筆極茲摹寫工  
徒啟玩物志

詎有責難恭願載旅饗篇持之獻九重

會徐元彬家食櫻桃

含桃初夏熟繁實綴柔條映日耀晴午凝露明初朝采  
之青眼眩粲若朱唇嬌瑪瑙照冰椀驪珠絢紅綃竒姿  
比閩荔美味似江珧佳人玉齒寒文園書渴消念吾困  
羈旅覩物心搖搖摘鮮想山圃寵賜懷天朝兵戈邁屯  
蹇身跡雙寂寥主人酷好事有酒即見招嘗許徧坐客  
分甘及垂髫靈丹入吾口可弭玉顏凋從此化凡骨遐

征隨子喬

讀徐君雲松小稿二首

雨霽石壇淨幽篁生綠陰微風東南來涼氣散衣襟  
拂苔坐青石焚香對碧岑細把新詩詠朱絃有遺音

歌詩本情性風雅何寥寥去古益以遠衆巧競誼囂華  
木鏤蟲篆綠裳剪冰綃邈哉雲松子孤鳳鳴清朝

長行歌

守節豈為名秉義不顧身于心苟無媿毀譽從他人我

生髮垂白干戈遘遭迤衡門久棲遯故土俄湮淪鳥逝  
辭舊巢魚遊避絲緡但知君臣義寧論骨肉親行道靡  
朝夕知我惟蒼旻王師在河上四野猶戰塵南征一何  
緩忠憤奚由信仰看雙飛翼涕泗沾衣巾

戊戌歲端午寓居慈溪有感

三載滯遊宦荏苒度芳辰屬茲端陽節復來慈水濱居  
闕謝人事過從無雜賓酒盃泛菖蒲予以壽尊親開門  
青山近霽色曉來新園榴發紅花堦草鋪綠茵對物固

可樂感時復酸辛  
原楚半荆棘  
江淮尚風塵  
蕩滌未有期  
安居諒無因  
舉世政沉湎  
誰為獨醒人  
載歌哀郢章  
掩涕思靈均

發嵯縣

行役苦晝熱  
戒程當夜闌  
睡覺呼僕夫  
出門路漫漫  
明月照人影  
踈星掛樹間  
流螢點衣袂  
零落濕中冠  
朝遠剡溪水  
俄入新昌山  
屬茲干戈際  
愈覺行路難  
愧無經世資  
何以濟險艱  
悒悒抱遠思  
綿綿起憂端  
東方忽已

白林鳥鳴閭闔前  
瞻石嶺峻喟然發長嘆

整書冊

閒居無所營暇日整書冊  
蠹魚生育蕃因悲久為客  
雜亂失次序損壞加補飾  
深好不知疲朝飢至忘食  
在昔手所置經目猶愛惜  
披閱備餘年豈為子孫積  
山妻向我語喪亂日侵迫  
一身尚為累挾此竟何益  
撫卷艱然笑欲應還復默  
汝言自有理終難已吾癖

秋成大水傷稼憫農有作

農人藝黍稷生理在西疇終歲事耕耨勞勩望有秋場  
圃既已築倉庾方期收大風連日雨原野漲洪流萬頃  
坐淪沒比屋盡悲愁公私急租賦何以備徵求既伏無  
鴈儲寧免溝壑憂饑饉乃荐至兵革仍未休民生病方  
悴天道邈以幽三復下泉詩慷慨念京周

過廣福寺石屏山房懷曾子白修撰陳伯清侍  
講

遊行滯春雨憩息依禪林寺門閉寥閭厓石聳嵌崿幽

禽飛復止修竹何森森賞寂屏塵慮觀空起遐心分榻  
坐雲影巡廊步晚陰緬懷玉堂彦曾此共登臨惆悵撫  
遺跡石徑蒼苔深

郊行

郊行日遲遲風和氣維穆溝渠水方漲隴麥秀以綠荒  
村兵燹餘蕭條數家屋農人重田事偶畊及春燠老婦  
餉其夫穉子飯黃犢我本疎散人出遊靡拘束已無簪  
纓累但望禾黍熟逍遙樂吾生奚復憂寵辱

入郭

久矣居荒村偶然入城郭  
踈懶性所成俯仰心內忤  
物情多變遷權門勢輝燿  
交遊問時事忘言廢酬酢  
壯士山中來羣行競超躍  
市人盡趨避寧論高齒爵  
我昔縻簪纓今茲釋羈縛  
知止免殆危懷寵嘆零落  
斯理世或昧遺訓仰先覺  
相知憐契濶出酒共斟酌  
干戈政縱橫盤餐亦蕭索  
南山筍可嘗西園麥初獲  
何能久留滯歸家且為樂

題高士煮茶圖

古皇嘗草木肥肥惠我氓百藥濟夭死五穀養其生維  
茶亦地產青青柯葉榮諒非急世用以茲遺芳馨後來  
競采摘紛紛事煎烹鬪品俗所尚輸貢官有程竭資困  
民力權貨為國經何人繪高士別味試鼎鑪細觀摹畫  
工令我感慨并口腹豈足貴思古心怍怍

為農

代耕久辭祿為農乃勞生既有形體累詎免衣食營瘠

土易荒穢鋤理恐弗勝晨出露未晞夜歸月已明避世  
敢求逸力作非取贏飢餐有脫粟美味止藜藿屬饜以  
為貴奚必膳牢牲玩華徇物役養真忘外榮陶潛信賢  
達千載仰其名

擇穀種

力穡已就斂嘉種及時收辛勤手自擇預為來歲謀秔  
穉悉遺棄稊稗寧復留去稿曝以日入窖藏諸幽及春  
農務興荷耒向西疇持茲佈隴畝可以望有秋生理在

農事朝夕不遑休躬稼聖攸尚素餐賢所羞耕作信艱  
食俯仰庶寡尤

白露

白露凋野草天氣淒以涼思親感時節悲哽涕其旁念  
昔負米歸曷以奉高堂祿養豈不願耕耘後時康風木  
動哀怨溘焉以淪亡歲月東逝波幽壤路茫茫遊魂何  
所之終古隔容光瞻彼反哺烏翩翩載飛揚蓼莪不忍  
讀仰視天蒼蒼

治圃有感

晨興荷鋤出蔬圃聊自治去草絕其根勿令生蔓滋嘉  
蔬日以長惡草日以衰手植葱與韭青青滿秋畦盤餐  
豈不足采摘有餘悲昔為甘旨具今茲將奉誰倚鋤向  
蔬立泪下沾裳衣

同蔣伯威朱德常遊育王山

春晴煙霧開地勝林泉迥杖策隨諸彥尋僧訪幽景古  
逕人影稀落日松陰冷徜徉谷鳥散臨憩山房靜玄賞

詎能忘塵慮從茲屏

寄張籌

遠遊違親戚慰意賴佳朋  
蕭條荒郊外喜子來仍雖  
敦詩書好恩與骨肉并  
夜語幾廢寢晚步每同行  
以茲故淹留靡知歲月征  
昨暮別我去攜琴過西垆  
一日為九秋咫尺有蓬瀛  
豈無二三子肺腑與誰明  
久客非所樂况兼貧病增  
西風吹庭樹百感聚中局  
盜賊滿滄海官軍尚縱橫  
東歸無羽翰棲棲愧微生  
願子數相過庶

幾開吾情

觀湖

勝日攜佳友出郊眺長湖積波何微茫巨浪爭奔趨隱  
耳驚萬雷喧空撼千夫上下宇宙混東西垠堦無晶淼  
浸百里徜徉吞三吳坤輿折不合鰲極傾莫扶晶光照  
秋日簸弄琉璃珠蜿蜒吳中山黛色青糝糊夫椒據其  
左林屋在南隅風前漁舸竝烟際歸帆孤幽浦出菱芡  
淺渚生葭蘆濯濯見白鳥汎汎浮青鳧雙眸勞應接宿

醒為之蘇倚樹興不淺哦詩神欲徂念昔天地闢水府  
開玄都禹功定震澤周官書具區于今幾千載灌浸無  
時枯吳越爭戰地廢興等樗蒲嗟我與諸君勝覽得自  
娛不須感今古臨風且傾壺

蔣狀元墓

晚步出西郊逶遲望邱畝松林何蕭森流水在左右孤  
墳隱其中斧封猶培塿剝石蒼苔深積土黃葉厚父老  
向我言茲墓由來久其人在前世獨擅文章手較藝多

士林精光動牛斗，桂折蟾宮枝名冠。龍榜首祿仕軒冕，  
貴勲業汗青有不阿。時相懼孤忠，志自守寵榮。一生前  
零落，百年後至今存。虛墓骨枯名未朽，我聞增嘆息。懷  
古思尚友，生雖不同時。神交或可取，落日啼歸鴉。寒煙  
暝幽藪，臨風薦秋菊。洒涕酌清酒。

古意

秋風天雨高，狡鶻氣方銳。白日逐飛禽，肆意飽吞噬。如  
何鸞鳳姿，飢鳴向林際。為惡反得食，焉能苦磨礪。

題山居圖

層巒積翠色中有嘉樹林幽人此避世結屋山之陰攜  
琴出山去獨懷千古知音不可見歸路白雲深

喜雨贈林子卿陳正夫

幽軒對客坐急雨簷前落陰雲破荒原涼風散林薄遙  
想東山下苗生青沃若與子結幽期歸來看秋穫

蘭蕙同芳圖

南國多芳草所貴蕙與蘭競秀露霜中同生厓石間青

青綠葉茂藥藥紫英繁含風散芬馥映月澹幽閒既保  
貞素節永絕芟夷患我欲繼騷客揚舲沂湘沅朝攀猗  
蘭枝夕覽芳蕙根雖無遠人寄佩服永勿諛

己亥六月五日趙彥名鄭玄成過寓所飲酒

城居倚邱壑幽徑類神仙佳朋得閑暇來此憇林泉布  
席意殊古解衣隨所便蘭香隨風至好鳥鳴尊前高談  
雜諧謔清吟代管絃且盡今日醉聊以樂吾天

雜詩十首

涼風何蕭蕭吹我庭前樹落葉辭舊枝飄飄逐風去時  
節倏已變奄忽流光驚人生少復老朱顏日非故獨居  
待幽期思君歲將暮

東園有芳草叢生滿平地昨日葉青青今日已憔悴榮  
枯豈足惜馨香委蕪穢佳人在空谷軒車何時至

明明天上月燦燦河邊星滾滾白露零唧唧草蟲鳴耿  
耿夜不寐鬱鬱悵多情迢迢思故鄉眷眷懷友生關河  
路修阻歲月忽已征安得如澠酒長醉無時醒

昔者子車氏西狩獲麒麟麒麟乃傷死誰知此獸仁反  
袂泣魯叟臯獍方成羣麟兮非時出不死奚足珍

死直仗清白此道吾所敦  
審審屈大夫乃獨為其難  
世方服蕭艾誰復佩蘭荃  
遠遊懷故都抱石沈江湍  
身隨流波遊名與白日存  
千年汨羅水不愧首陽山

荆卿適燕市慷慨無人知  
飲酒對屠狗擊筑過漸離  
如何田光子進賢獨見推  
匕首入咸陽一去不復歸  
縱使秦王死寧扶燕國危

豫讓臣智伯報之以國士吞炭思報讐高誼照青史丈夫千金軀一死為知己獨憐齊王橫衆客寧同死

有客山中來遺吾青色銅欲鑄菱花鏡空照妍媸容留之為莫邪可以斬蛟龍世無歐冶子詎忍委庸工

精衛填東海銜土無時休東海填不乾口血如丹流人皆嘆精衛勞生何拙謀胡為反役物營營春復秋

天地生衆人豈無賢與愚徇名乃烈士貨殖唯貪夫白日催容顏朝榮還暮枯倏然隨物化處世竟何如種蘭

滿幽室願同君子居

懷交川諸友

積雨開霽色和氣散微烟遊情陟層巘凝涕望交川青  
天何漠漠白鳥去翩翩遙思羣彥集從之路渺綿

題張子房歸隱圖

平生三寸舌乃為帝者師韓讐既已報漢爵焉能縻歸  
隱豈忘世明哲諒知幾獨有鷓夷子千載共幽期

石菖蒲

石上種菖蒲盆中蓄清泉托根不待養翠葉何鮮鮮沃  
土生蕭艾青青當路邊蕭艾人所惡菖蒲人所憐

悼慈童

慈童我愛子聰慧殊可憐五齡解人事頭角何嶄然朝  
餐侍我食夜宿就我眠羣兒競嬉戲端坐舒以安有時  
弄筆墨塗抹笑且言我族日衰冷俟汝興我門胡為邁  
瘡疾奄爾歸重泉幼穉何所依哀哉彼蒼天娟娟秀眉  
目夢想在吾前鮑靚尋故井羊祜憶遺環汝魂尚有知

念我當來還再生為父子慰茲衰暮年

種槿花

炎方有槿樹衣被代蠶桑舍西得閒園種之漫成行苗  
生初夏時料理晨夕忙揮鋤向烈日灑汗成流漿培根  
澆灌頻高者三尺強鮮鮮綠葉茂燦燦金英黃結實吐  
秋繭皎潔如雪霜及時以收斂采采動盈筐緝治入機  
杼裁剪為衣裳禦寒類挾纊老穉免淒涼豪家植花卉  
紛紛被垣牆于世竟何補爭先玩芬芳棄取何相異感

物增惋傷

漁溪隱居為俞希聲作

幽人事隱遯結屋溪山居浮波繞閣檻白鷗戲庭除沿  
溪盡漁者日日溪中漁東風二三月綠水泛菰蒲漁舟  
倚南岸垂綸得嘉魚臨流買魴鯽無復煩招呼徐傾缶  
中酒旋摘舍後蔬烹鮮具盤餐舉觴對妻孥懽然醉自  
語榮名竟何如信知軒冕貴不及隱者娛

贈薛相士

客有薛相士訪我高士廬謂我有殊態耳白面不如伊  
昔歐陽子有相與此符嘉名動天壤千載流聲譽我聞  
笑且謝造化咸吾軀窮通及壽夭賦子終不渝惟有文  
字功可以勤力圖垂輝沒世後照映青簡書非敢望前  
哲庶免同下愚素心固所願子意無乃諛茲言如果售  
吾生更何須

花圖

嘉卉各自媚敷榮發光輝根異葉亦殊花開不同時鮮

鮮映幽戶一一含妍姿乃知造化功榮華俱有期芳菲  
如可采勿令傷暮遲

容春軒

層軒結構幽當窻蒔花木簷雲棲夕陰庭鳥鳴晨旭四  
時景物佳早晚風氣淑主人頗解事洒掃置書軸攜琴  
來佳賓開尊瀉醞醪微酣有餘懽諧笑春意足寧知城  
南居秋風滿茅屋

對菊

佳菊性所愛，金英霜後敷。見之開旅懷，移植向庭隅。豈  
無杯中物，幽賞與誰俱。今晨佳友過，花下共懽娛。西舍  
新醪熟，足以供所須。

題蘭

幽蘭石間生，自與蕭艾異。開花霜露中，顏色靡憔悴。空  
山無人知，誰攜筐筥至。終焉抱國香，百草不敢蔽。冷風  
颯然來，芬芳滿天地。

陸景周東園隱居

陸生東園隱風景一何佳既載陶潛菊亦種邵平瓜于  
焉識真趣寧復慕榮華回顧殉名者簪纓何足誇

送章鍊師

山城值徂歲羈思鬱難宣幽人從何來笑言接清溫出  
遊同策杖相遇輒傾尊飄然忽辭去寥廓羨孤鶩

惜別

江山無行人天寒况風雨出門辭友生情深別良苦寒  
衣感繾綣豈不念留處高堂想歸期歲月不我與停舟

且勿迫傾尊出清醑酒短意更長含悽我無語

大水懷何汝樵

玄冬降大水高原流白波出門無舟楫念子抱沉疴空  
慚乘輿友歲寒心靡他不能裹飯往孰聽鼓琴歌世情  
日迫阨四郊鬪兵戈雖出龍蛇歲賢人猶網羅達生固  
委運天意竟如何我身久行役暫喜歸林阿交朋各憂  
患蓬革誰經過感時少娛樂索居嘆蹉跎安得扁鵲術  
起子同婆娑

松泉舊隱

彼美嘉邈士築室山之陽山根多松樹源泉出其傍歲  
寒色青青雨霽聲浪浪飲水解我渴餐松以為糧已無  
軒冕念寧復事紛攘丈夫重出處隱顯各有方豈其愛  
松泉而與世相忘懷才成獲落適意聊徜徉當知衡門  
隱不似接輿狂

畫鷹

淮公所藏鷹年代不可校惟于素絹中彷彿見形貌骨

格聳蕭森神氣張雄鷲古人毫端妙今世豈能到掛之  
空壁間簷雀不敢噪秋風天宇高呼哨欲騫蹈我觀英  
俊姿感激成憤悞鳴鳥羽連翩狐兔影顛倒非無鳳與  
麟潛伏在深奧借爾雙翩健為我作司覲

送商時雨

昔我到黃巖日與乃翁遊汝時在襁褓索栗聲呶嗷到  
來十八年相逢向東甌汝才正英發我已霜滿頭客居  
喜鄰近朝夕慰羈愁吟詩出秀句窮經企前修將迎無

虛日禮數亦何優竒毛覩鴛鴦名駒見驂駟忽來與我  
辭歸途戒清秋前日送乃翁作惡獨未瘳今晨汝復去  
吾亦難久留維時尚艱危武臣奮干矛王師過淮甸指  
日清遐陬愿言蘊竒璞磨礪待搜求崇山覆篲積源水  
盈科流期汝在霄漢顧我終林邱臨分曷為贈愧無琛  
與球采蘭江之澣聊以寄綢繆

出吳門有懷聲公

牽舟泝滄波回首遠城郭人家渺煙靄佛塔倚寥廓曠

楚鴻鴈飛沉吟西日落懷茲物外侶白雲何悠邈

山陽詠懷三首

平生高世志耿介無俗情自予出山來始為塵網縈強  
飲事俯仰內媿常交并立身自有道胡為日營營朝飲  
淮河水暮宿山陽城淹留非所樂羈旅竟何成

旅寓意多違百感中夜集本來麋鹿性誰甘白駒繫絨  
默非忘言衲鑿恐難入榮名亦何用令德苦未立念茲  
日月逝少壯懷靡及歸哉復歸哉江湖風浪急

淮水清且長遠天望冥邈野草正萋萋幽花何灼灼春  
來百物榮禽魚亦飛躍凄然獨客懷有酒共誰酌故人  
同鄉子異縣共漂泊朝夕庶往來諧笑慰寥落



不繫舟漁集卷三

欽定四庫全書

集部

不繫舟漁集卷四至六

詳校官編修臣范來宗

中書臣劉源溥覆勘

覆校官中書臣朱 鈐

校對官助教臣胡子襄

謄錄貢生臣孔繼峯

欽定四庫全書

不繫舟漁集卷四目錄

七言古詩

題空明道人卷

題十八學士圖

題取履圖

山中讀書圖

牛圖

題太白納涼圖

啄木鳥

贈相士王伯善

青山白雲

促織鳴

螳螂捕蟬

無絃琴與鄭玉孔正夫劉景玉周元浩分題席

上賦

白頭吟

折楊柳

我馬黃

折花詞

食蓮詞寄同年諸公

別林文懋

海日出東方

題牛圖二首

海水波問友人

元日醉歌

雲松巢為許雲隱賦

欽定四庫全書

不繫舟漁集卷四

元 陳高 撰

七言古詩

題空明道人卷

委羽山之東海東空明洞天之中乾開坤闢幾千載  
異境不與人間同日月長明天澹澹風雨不到春融融  
丹霞翠霧相掩映瓊樓玉宇開玲瓏碧桃空花自結實  
紫芝長葉還成叢其中居者盡仙子安期羨門與韓終

指揮玄鹿使朱鳳左右玉女前金童洞門深閉隔塵土  
凡人欲至無由通神仙所都信幽秘靈竒詭怪誰能窮  
傳聞當時劉道士遯世曾此收玄功丹成九轉火候足  
身騎鶴背摩蒼穹鶴翎飛隨雨白雪至今異事驚盲聾  
桑田滄海幾變化白鶴一去何匆匆空明道人學仙者  
志慕輕舉追遐風生來風骨迥自別瞭然碧眼明方瞳  
少年簿書逐吏役一旦衣冠隨楚翁傳方已嘗宿王子  
問道直欲登崆峒黃庭誦罷白日靜步虛聲遠青山空

飽餐朝霞飲沆瀣肌膚不老腴而豐坎離鉛汞媾龍虎  
夜半光射泥丸宮終當羽化上仙去親朝玉皇躡彩虹  
世人紛紛浪生死追奔利欲勞其躬非無嘉禾與靈草  
往往蠹蝕生螟螽嗟哉斯人不可及青天萬里飛冥鴻

題十八學士圖

弘文學士十八人風流儒雅何彬彬瀛洲高步擬仙客  
爭依鳳翼攀龍鱗一時秦府風雲叶三百餘年開帝業  
就中房杜才最優簡冊功名光煒赫天生英賢何代無

委棄還同草木枯  
明良相遇古難得  
試觀圖畫成長吁

題取履圖

子房取履圮橋下  
絹素何人巧摹寫  
忽看圖畫雙眼明  
英雄之心孰知者  
俯從呵責不敢嗔  
老人自是非常人  
素書一旦授兵法  
佐漢興王誅暴秦  
憶昔報仇事狙擊  
壯氣何曾受摧抑  
他日運籌帷幄中  
方知豪俠非良策  
漢家三傑垂無窮  
蕭繫韓誅悲大風  
全身獨棄人間事  
端藉當年進履功

山中讀書圖

遠山如藍近山綠前門蒼松後門竹幽人讀書棲石根  
有客拏舟訪溪曲白雲冉冉落虛窓清風泠泠散飛瀑  
林泉深處隔紅塵便欲相依結茅屋

牛圖

有牛齧草古樹傍牧兒枕石眠斜陽牛馴不動牧睡穩  
山無猛獸煙蒼茫春耕已畢政閑暇寧復驅馳勤服箱  
昇平爾牛尚云樂何須更問民物康年中櫬槍照中野

原隰邱陵多虎狼食人之肉以為糧草間况有肥牛羊  
楊家貲產久零落渤海政治今淒涼臨風覽畫長太息  
莫說桃李更斷腸

題太白納涼圖

六月炎天飛火鳥土焦石爍河流枯邇來衰病更畏熱  
呼叫欲狂揮汗珠飲冰嚼藕廢朝夕小室如爐眠不得  
閑將畫圖懸四壁漫想深山好泉石就中此圖尤絕奇  
青林飛瀑吹涼颼何人展席坐蒼蘚乃是謫仙初醉時

露頂裸程投羽扇仰看雲生成白練松陰如雨毛骨寒  
豈識人間裨促倦祇今匡廬道阻修雁蕩天台近可遊  
便欲置身邱壑裏掛巾石壁繼風流

啄木鳥

啄木鳥啄樹枝頭紅如血口如錐終日啄木嘗苦飢木  
心有虫不肯啄天生爾禽復何為吁嗟乎啄木鳥佳木  
蠹盡知不知

贈相士王伯善

王生年少有奇術江海風流走霜露胸中記得許負書  
眼底閱人不知數忽來見我闔閭城紛綸辨口輕風生  
自言相將入京邑曳裾甲第干公卿我聞古人相有道  
相形不如相心好大官大邑惟論德奚問顏腴色枯槁  
君不見李將軍援臂舍矢追奔雲一朝降卒化為血白  
頭不立封侯勛又不見裴丞相半世飢寒苦飄蕩還犀  
感動天公知置身台衡九天上貧窮富貴雖在天禍淫  
福善非偶然重瞳或以剛暴死蒙俱削瓜多聖賢如何

邇來事非昔天意蒙蒙真莫測規行矩步厭藜羹蜂目  
狼聲甘肉食王生王生良苦辛我歌爾聽慎勿嗔不如  
歸山讀書史飽食黃精看白雲

青山白雲

山幽幽兮露溶溶山之谷兮惟吾之宮吾行兮四方思  
青山兮心忡忡歲既晏兮吾將曷從覽白雲兮俯孤松  
暫歸來兮山中

促織鳴

促織鳴鳴唧唧懶婦不驚客心悽惻秋夜月明露如雨  
西風吹涼透絺苧懶婦無裳終懶織遠客衣單恨砧杵  
促織促織無復悲鳴客心良苦懶婦不驚

螿娘捕蟬

螿娘捕蟬蟬鳴聲悲捕我一何急令我不得飛與我同  
類初不爾疑爾何不仁捕我將食之我身無肉不能充  
飢我體無血啗我不肥吸風飲朝露終日棲高枝嗟哉  
螿娘爾胡捕我為嗟哉螿娘爾胡捕我為

無絃琴與鄭玉孔正夫劉景玉周元浩分題席

上賦

我有綠綺琴而無朱絲絃無絃何以彈蠹蝕底孔穿軒  
轅鈞天久不作有虞南風竟茫然越裳岐山嗟寂寞猗  
蘭將歸復誰傳自從鍾期死伯牙絕之今幾年太音聲  
本希至樂樂其天妙理無成虧鬼神不敢窺幾先何用  
勞指爪移宮轉羽揮商弄徵錯襍空喧闐兒女喋囁訴  
恩怨百禽啁啾春風前聽之徒令人悲不如無音音自

全琴無絃無絃乃真琴秦箏熱耳琵琶盤心桑濮亡國  
鄭衛哇淫孰若無絃琴中有太古音終日聽此不知倦  
但覺世上萬物皆聾瘖嗚呼我琴無絃我琴有聲不調  
自和不鼓自鳴大聲塞天地小聲殷雷霆百怪辟易魑  
魅驚西方之人渺何許安得奏之天帝庭琴無絃絃非  
無知音誰義皇徒

白頭吟

試聽白頭吟漫飲尊中酒古來悲白頭人情苦難久結

髮為夫妻百年期白首容顏衰落相棄捐何況君臣與  
朋友漢高寬大主蕭何開國功讒言一以入幾死天獄  
中陳餘與張耳刎頸同生死一朝爭相印讐讐世無比  
周文呂望不再見管鮑結交寧復聞玄德孔明若魚水  
膠漆孰如雷與陳斯人自此日以少今世求之更無有  
談笑尋干戈那能托身後聽吾歌歌白頭勸君飲君莫  
愁日月有時而剝蝕世態誰能終不易

折楊柳

折楊柳送別離朝朝送人遠別離門前楊柳折還稀今年折楊柳來歲復生枝奈何離別子一去無回時

我馬黃

我馬黃君馬蒼君馬不如我馬強黃馬終日嚼枯萁蒼馬食豆飽不飢我馬不如君馬肥莫把兩馬相馳逐肥馬行遲瘦馬速

折花詞

道傍海棠花顏色如臙脂美人花下過信手折花枝長

枝既折盡短枝仍折歸好花不合開當路非但捐枝還  
捐樹

食蓮詞寄同年諸公

曉食盤中蓮忽思水中藕蓮蒨苦如荼藕甘能爽口甘  
苦雖不同同生泥水中得蓮薦蓮實采蓮歸藥籠奈何  
蓮有蒨貴人終不食藕絲雖長難繫蓮蓮抱苦心空自  
憐

別林文懋

我昔山中來牆梅花正開吾今別君去枝頭實無數光  
陰東逝波百歲能幾何有酒且須飲莫聽別離歌歌聲  
使腸斷欲醉千愁散但令酩酊忘分攜明朝相憶各東  
西

海日出東方

海日出東方照見千萬里飛騰到中天晶輝正無比蹠  
蹠蹠蹠三足鳥何年飛到日宮裏奮翅生雲烟啄物成  
渣滓朝引羣鳥天上來飛翳日光雷虺虺高岡鳳凰不

敢鳴鷓鴣爭食乘時起可憐羲和為御在日傍不能擊  
烏令之死我有利矢新刮磨手持長弓彎九弧欲仰射  
天恐傷日吁嗟奈爾駿烏何

題牛圖二首

耕牛息樹陰身老筋骨疲牧夫鞭之起強起力不支噫  
噓噓世無葛盧哀鳴徒爾為道傍問喘今有誰

牧子晨出牧原野露未晞牛嚙松下草露甘春草肥草  
肥食飽牛力強城南飢牛還復箱

海水波問友人

海水波波茫茫浸若木兮淪扶桑河伯嗟咨空望洋海  
波無時乾賈客來往愁斷腸海水波連天河海止行人  
舟楫多馮夷奮怒驅蛟鼉海波高如山嗟爾行人愁奈  
何

元日醉歌

今日元日風雨不可以出門苦寒坐對椒花尊尊中有  
酒飲不竭醉裏凍色回春溫浩歌張眼望天地地遠無

極天高難捫天地生我為人在世間胡為碌碌乃同羝  
觸藩既不能高飛逐黃鵠又不能變化隨鵬鷖自從折  
桂蟾宮還愁聞戎馬彌中原解脫簪纓委泥土五年養  
痼尚邱園我思古來豪傑士卓卓犖犖不與時俗渾或  
攀龍鱗附鳳翼致君堯舜上手擎日月扶乾坤或懷瑾  
瑜潛棲傍巖穴聲名輝赫照耀人目如朝暎古人已矣  
不復見世上餘子紛紛奚足論東西南北滿地長荊棘  
遠遊何處推吾轅我將駕赤豹乘文鵠度弱水登崑崙

長揖西王母笑攜赤松羨門與之相攀援玄圃去天纔  
咫尺馭風直上叩天闔稽首玉帝前敷衽跪陳忠蹇摠  
煩寃帝為萬方主胡乃降淫虐久困吾黎元願遣飛廉  
與豐隆掃蕩八極煙塵昏盡殛豺狼驅虎誅鷹鷂要使  
騶虞鸞鳳生育蕃湛露降厭浥萬國沾天恩四海蒼生  
既躋乎壽域我乃歸臥青山根一年釀酒一千甕日日  
醉飲烹羔豚人間此樂不可言人間此樂不可言

雲松巢為許雲隱賦

昔者太古初未嘗營棟宇巢穴以為居羽毛並棲處自有宮室幾千年樓臺厦屋蜂房聯丹楹藻梲闢華巧誰復營巢青樹顛我聞碧山中乃有巢居者危枝髣髴似僧巢雲影松陰在其下高當初表凌玉清五月六月寒風生游龍曉出山雨暝白鶴夜歸秋月明纖塵不到喧啾隔神仙時來作賓客閑遊子晉吹鳳簫醉對安期擘鱗腊世間滄海成桑田邇來滿地驚烽烟誰似山中巢隱士長年松頂伴雲眠武陵桃源已無路南嶺豺狼不

知數吾將從爾結巢居更覓雲松最深處

不繫舟漁集卷四